

ODLUKU

O POSTUPANJU MINISTARSTAVA, UPRAVNIH ORGANIZACIJA I DRUGIH INSTITUCIJA BOSNE I HERCEGOVINE PRILIKOM PREDUZIMANJA AKTIVNOSTI I POKRETANJA POSTUPAKA U PODRUČJU MEĐUNARODNIH ODNOSA KOJI IMAJU ZA CILJ OSTVARIVANJE MEĐUNARODNE SARADNJE IZ NJIHOVOG DJELOKRUGA RADA

Član 1.

Ovom odlukom uređuje se postupanje ministarstava, upravnih organizacija i drugih institucija Bosne i Hercegovine prilikom preduzimanja aktivnosti u području međunarodnih odnosa, koje imaju za cilj ostvarivanje međunarodne saradnje iz njihovog djelokruga rada i zaključivanja međunarodnih sporazuma iz njihovog djelokruga rada koji nemaju karakter međunarodnih ugovora u smislu Zakona o postupku zaključivanja i izvršavanja međunarodnih ugovora.

Član 2.

Predsjedništvo Bosne i Hercegovine (u daljem tekstu: Predsjedništvo) isključivo je nadležno za vođenje vanjske politike Bosne i Hercegovine, predstavljanje Bosne i Hercegovine u međunarodnim i evropskim organizacijama i institucijama, traženje članstva u onim međunarodnim organizacijama i institucijama u kojima Bosna i Hercegovina nije član i zaključivanje međunarodnih ugovora Bosne i Hercegovine.

Član 3.

Ministarstva, upravne organizacije i druge institucije Bosne i Hercegovine, prilikom preduzimanja aktivnosti u području međunarodnih odnosa koje imaju za cilj ostvarivanje međunarodne saradnje iz njihovog djelokruga rada, dužni su da se pridržavaju vanjske politike Bosne i Hercegovine koju je utvrdilo Predsjedništvo.

Član 4.

Ministarstva, upravne organizacije i druge institucije Bosne i Hercegovine dostavljaju Predsjedništvu na odobrenje prijedlog za zaključivanje svakog međunarodnog bilateralnog ili multilateralnog sporazuma iz njihovog djelokruga rada, koji nema karakter međunarodnog ugovora u smislu Zakona o postupku zaključivanja i izvršavanja međunarodnih ugovora (kao što su, na primjer, memorandumu o razumijevanju, protokoli o saradnji i slično).

Prijedlog iz prethodnog stava ovog člana sadrži: tekst sporazuma, razloge zbog kojih se sporazum zaključuje, obrazloženje zašto sporazum nema karakter međunarodnog ugovora u smislu Zakona o postupku zaključivanja i izvršavanja međunarodnih ugovora, naznaku visine sredstava potrebnih za izvršavanje sporazuma i način njihovog osiguravanja, naročito ako se ta sredstva osiguravaju iz Budžeta institucija Bosne i Hercegovine, ocjenu da li sporazum pretpostavlja potrebu donošenja novih ili izmjenu postojećih zakona Bosne i Hercegovine, te ocjenu da li sporazum proizvodi međunarodne pravne, finansijske ili druge obaveze za Bosnu i Hercegovinu.

Član 5.

Međunarodni sporazumi iz člana 4. ove odluke ne mogu se zaključiti bez odobrenja Predsjedništva.

Član 6.

Ministarstva, upravne organizacije i druge institucije Bosne i Hercegovine dostavljaju Predsjedništvu i Vijeću ministara Bosne i Hercegovine izvještaj o zaključenju međunarodnog sporazuma, koji je Predsjedništvo Bosne i Hercegovine odobrilo u skladu s članom 4. ove odluke, a originalni primjerak sporazuma dostavlja se Ministarstvu vanjskih poslova Bosne i Hercegovine na evidentiranje i čuvanje.

Član 7.

Ova odluka stupa na snagu danom donošenja, a bit će objavljena u "Službenom glasniku BiH".